

Mahasiswa Perlu Jadi Agen Perubahan Negara



Raja Muda Perlis yang juga Canselor UniMAP, DYTU Tuanku Syed Faizuddin Putra menasihatkan para mahasiswa agar menjadikan diri mereka sebagai agen perubahan dalam membantu merealisasikan impian negara. Baginda bertitah pengetahuan dan pengalaman yang dimiliki mahasiswa boleh dikongsi dengan masyarakat setempat sekaligus mampu mencorak mereka ke arah masa hadapan yang lebih baik. DYTU Tuanku Syed Faizuddin bertitah demikian selepas merasmikan program Inovasi Sosial 1Malaysia (InoS1M) kali ke-7, di Dewan Besar UMNO, Kuala Selangor, Selangor. Turut hadir, Ahli Parlimen Kuala Selangor, YB Dato' Irmohizam Ibrahim dan Naib Canselor UniMAP, Brig. Jen. Datuk Prof. Dr. Kamarudin Hussin.

Program tersebut membabitkan lebih 80 mahasiswa yang akan berhimpun di 24 buah kampung seluruh kawasan Parlimen Kuala Selangor bagi menyertai program yang akan berlangsung selama tiga hari. Program bertemakan *Towards Nature* merupakan platform kepada mahasiswa dalam melaksanakan tanggungjawab sosial terhadap masyarakat dengan membawa misi melestarikan alam sekitar di samping membudayakan semangat cintakan alam sekitar kepada semua golongan dan lapisan masyarakat di seluruh negara. Penganjuran InoS1M kali ini adalah berbeza dari penganjuran tahun-tahun sebelumnya apabila UniMAP memilih untuk menjalankan aktiviti tersebut di 10 buah negeri membabitkan 12 kawasan Parlimen dengan penyertaan hampir 3200 orang pelajarnya..